

QVÆSTIO MEDICA.

QVODLIBETARIIS DISPVATIONIBVS MANE DISCVTIENDA

IN SCHOLIS MEDICORVM, DIE IOVIS, XIII. IANVARII,

M. FRANCISCO MANDAT, Doctore Medico, Moderatore.

An Melancholia & Epilepsia mutue vices?

991.

MORBORVM vt non vna est indoles, ita nec vnus exitus: ad interitum non pauci, ad salutem plures deducunt: nunquam non ad alterutrum omnes. Et verò sicut ad vnam mortem multiplex patet via sic multiplex ab aduersâ valetudine ad secundam reditur. Quocumque modo dissoluatur morbus, sit quidem crisis: sed tum maximè cum subitâ molesti humoris depulsione, eo penè momento fungitur æger. Atque hæc locum habet in morbis, sed admodum paucis: in leuioribus, quos facillè Natura superat nulla speranda: nulla & in longis, in quibus ad pugnam prouocata nunquam accedit: sed nec in malignis; quòd defecta viribus, sæpè in medio succumbat itinere. Solum ergo in iis est conspicua, quos aut citò extinguere, aut extinguere necesse est. Et his quoque temporibus, quàm superioribus rarior: Ex quo nempe in subsidium Naturæ designati Medici, morbi fomitem ac veluti commeatum subducendo, res ægrorum dubio certamini committere non valde tutum iudicant: hinc iam multi quotidie periculo subtrahuntur, quos si veterum more vires cum morbo experiri patiaris, tanta profectò sit humanitas, quanta olim in Tyrannis qui hominem totis vsum lacertis, cum feris credidi compellebant.

CAVE interim salutis humanæ præsidem artem crism moliri putes; est enim id singulare Naturæ opus, quâ repugnante nihil medicina proficiat, vigente verò feliciter interdum auxilia, etiam cum aliqua temeritate rapit, interdum quo superstes sit æger, impetum morbi trahendo, porrigit in id tempus quod præbeat curationi locum: prudens siquidem artifex crism inhibere aut differre mavult, quàm periculosa festinatione, immaturam accelerare. Est & vbi seu fiducia, seu desperatione victoria, perinde ac luctæ periti iudices, nihil aliud quàm prospicit & prædicit vter è luctatoribus sit victurus: si cui temerè habito malè res cadat, professoris, non artis crimen est. Vna itaque Natura quod primum formauit corpus, sanat: & quemadmodum in fingendo, ita in sanando monstra nonnumquam producit. Cum autem trita procedit viâ, si pollet robore, parentem morbi humorem, aut fudore digerit, aut hinc, inde è venis, aut denique vesicâ, vel quod tutius, aluo fusiore deponit, aliàs quidem vniuersum, aliàs partitè. Quod si inopiâ virium, totam se nequit affatim expedire, sæpè villiorum partium damno, Principibus consulit: sæpè & ob contumacem materiam, obstructa meatuum itinera, prauam viuendi medendi-ve rationem; morbum non tam debellat, quàm mutat in alium, nunc mitiorem, nunc grauiorem, cum quo tamen aut subiecti, aut materie, aut certè vtriusque ratione consentit.

MELANCHOLIA non humoris, sed morbi nomen est, mentis nimirum alienatio, in quam qui incidunt, perpetuo metu ac mœrore perculsi, cogitant, obloquuntur, aut præstant absurda, & à consilio rationeque abhorrentia, hoc solo felices, quòd eâ imprimis parte valere se putant, quæ laborant maximè: ægrè vt propterea ferant, si quem ferunt animo conceptum errorem tentes detrahere. Si febrem huic affectui negas vnquam esse coniunctam, non satis vides. Sub hoc ferme inexpugnabili morbo non vna est, rerum & symptomatum facies, sed varia pro cuiusque ægrotantis ingenio & moribus: alter assiduo & intempestiuo risu resoluatur: alteri vultum contrahit seueritas: iste nihil sibi queritis impertit: hic torum se tradit desidia: alius fandi non impotens, sed negligens obmutescit, alius effusè loquitur: Hic qui sanus penè humani modum excedebat ingenij, possit nunc cum pecudibus de stupiditate contendere: contra ille qui nuper vix habebat aliquid hominis morbi maleficionè, an beneficio? arcana Naturæ penetrat & explanat, quandoque etiam linguâ peregrinâ, nec ante notâ, futura nullo affante præfigit: denique quasi corporis vitia nihil pertineant ad animam, ita se erigit, vt ea factis atque cogitatione assequatur, quæ dæmone digna, humano captu maiora credunt imperiti, & malè docti.

RO G A S quæ causa mentem sua sede dimoueat, vnâque vires corporis, exoluit? paucus sanè isque melancholicus humor, qui vti dum amicum Naturæ temperiem retinet, hominem rebus omnibus excellentem suprâ mortalium conditionem euehit; sic vbi natiui caloris dominio non amplius subiacet, eò redigit ægrum, vt cum humana specie animum exuisse dicas; quasi videlicet æternâ lege sanctum sit, inde vt nascantur summa mala, vnde & summa bona. At is quoque prope pestifer humor vno plerumque partu monstrum edit biceps, & quos modò labefactò iudicij regno, vanis ludebat imaginibus; prorsus mente, sensu, voceque captos, ac velut de cælo tactos repente deiecit, inuito fœdiorum excrementorum effluuio miserandos. His iniuriis obnoxios esse illustres & heroici viros ingenij, pridem vsu compertum est: Ita volente Naturâ, vt qui præ cæteris sapere solent (ne quid sibi temerè tribuant) aliquando desipere, aut planè mente destitui videantur. Patent tamen & Epileptici insulsi tardioris ingenij homines, ex quibus nonnulli quàm in secundâ valetudine præstantium virorum famam consequi non valent; ex portentosa ægritudine diuinitatis opinionem collegerunt.

QVANDO igitur melancholiam & Epilepsiam communis alit causa; facilis ab altera in alteram transitus isque modò *ἐκ μὲν ἑνὸς* modò *ἐκ τῆς ἑτέρας* quippe vbi niger & fæculentus humor, fermenti more elatus, præcordia, venas, & arterias inflat, lentisque viscerum nutritiorum ignibus leuiter incalcescit, immane quantum offest cordi, quàm multis cerebrum imbuit fumis, quibus spiritus inficit, offusâque toti domicilio mentis caligine, facit è nitidissima arce, atrum obскурumque carcerem, in quo qui non pauet, ac mœret, lucem odit, & vitam. His passibus itur ad melancholiam, lene tormentum ægrorum, graue Medicorum. Ab eâ autem, quàm sit proximus ad Epilepsiam gradus, inde habes, quòd si corruptus & efferus humor, vel solus vapor quem halat ex intervallis, in id influat descendatque cerebri antrum, in quo reciduntur recens elaborati spiritus statim distendit ægrum testem locupletissimum Naturæ cum ipso luctantis. Ita ad melancholiam accedit Epilepsia, quæ & istam discutit, quoties sparsus per cerebri substantiam humor aut vapor totum, se recipit in medium cerebri sinum, vnde & si valido naturæ conatu excutitur, certa presensque salus; modò ne quid eò mandent fœta prauo hoc succo viscera. Nonne vero & comitialis morbus par pari refert melancholiæ? certè nihil procliuius quàm vt hanc aduocet ratio metuque cadendi: quæ duo, quoniam egrum perpetuò malè habent, tandem & melancholicum reddunt: atque sic etiam in mentem repit qui Epilepsiam peperit humor.

Ergo Melancholia & Epilepsia mutue vices.

DOMINI DOCTORES DISPVATVRI.

M. Ioann. Baptist. Moreau.

M. Eusebius Renaudor.

M. Isaacus Renaudor.

M. Tassanus Foucault.

M. Antonius Morand.

M. Nicolaus Blanchet.

M. Nicolaus Mathieu.

M. Carolus Dupré Pr. C. M.

M. Petrus Hommets.



Proponēbat Lutetiæ IOANNES ANTONIVS BOVRGAVD Montisburgæus. A. R. S. H. M. DC. L.